

Gaqlaqtil

Gevq-a nail gaq

Haoqgavq niil keiv iqmoeq ilmoeq bhai Gaqkhoel Paolluv aivq-i mail geqv-a nail ngaol dai, geqv-ai thaq nail ngaol. Milnee uqnee khe Khali yaq juq iqsanl, Paolluv-i mail geqv-a nail ngaol dai, noeq nail ngaol.

Gevq-a nail aqyanq khi mail aqduq

Gevq-a nail aqyanq neq, A.D. 48-49 kovq nail gaiqlaq bhai ngaol. Paolluv milkhaoq doi dai lavqkhiq tsail nail geeqlaoq daoq cavq ail-a nail iqmoeq ilmoeq dov-ail khi kovq lal-al nee ngal-aq, Sulliv milkhaoq bhai jiav nail Aqdil-aogq meenq bhai jaol khi geqv-a nail ngaol. Thailhai ngaol-aogq, teevq pav ganav juq neq, A.D. 51-53 kovq nail gaiqlaq bhai geqv-a nail ngaol dai, noeq nail ngaol. Geqv-a nail aqduq neq, Aqdil-aogq meenq maq ngel haq neq, Gaolliqthu meenq bhai dai, noeq nail ngaol.

Khaq sil gaq bhai geqv bhiq-a nail

Haoqgavq niil keiv neq, Gaqlaqtil milkhaoq bhai jaol nail Khali yaq munl bhai geqv bhiq-a nail ngaol. Gaqlaqtil milkhaoq bhai jaol nail tsaol-aq juq neq, Yuldav tsaol-aq maq ngel-ail. Paolluv milkhaoq doi dai lavqkhiq tsail nail geeqlaoq daoq iqmoeq ilmoeq cavq ail-u khe pov, Gaqlaqtil milkhaoq bhai jaol nail tsaol-aq juq, maodai Khali yaq pevq lal-a nail ngaol. Thailhai ngaol-aogq, Paolluv a bhai nee dov ail jel-u phao,

Khali yaq pevq khi ngaol-aoq, Yuldav nail aol thaoq nail juq, Khali yaq pevq nail yu nail jeq-e jaq-a juq bhai, Yuldav nail aoldaoq kovqdaoq khal jiav nail khe-ai iqsanl ya nl nail ngaol dai, cavq lee-a nail ngaol. Alheel ngel-i mail, al juq nail haoqnao tsaothel-aivq-a nail juq jaol nail ngaol.

Khul bhai noeqthunq khi gevq-a nail

Haoqgavq niil keiv neq, Khali yaq juq hevqkovq nail phaqa ya nail neq, aoldaoq kovqdaoq khal jiav nail khe-ai nl tsao nail ngel-i mail, maq ngel-ail. Miqyail nail geeqlaoq eeljaol khi neema thaqtsaol nail phaqa bhaqda nee taivq-ail, tsaq nail daol nail tsaol-aq pevq lal khi hevqkovq nail phaqa ya nail ngaol dai, cavq bhiq cov bhiq nail haoqgavq ngaol. Al ovqtavq, Khali yaq pevq lal gaq haq neq, aoldaoq kovqdaoq nail yaqkav maq ngel yaoq-aol. Alheel ngel-i mail, cavq bheeq nail juq nail haoqnao maq ya tsaothe dai, yaolphaol yaoq dai, cavq bhiq cov bhiq nail haqbhoil gevq-a nail haoqgavq ngaol.

Iqmoeq ilmoeq khe daoq

¹ Gaqkhoel bhi jiovaq nail haqbhoil tsaol-aq yaq-i mail khul-a nail maq ngel-ail, tsaol-aq yaq-i mail gaqkhoel kha lavq-a nail iqsanl maq ngel dai, Yeiqsul Khali khi aivq bhai bhi doevq kovq lal-a nail Aqbhu Miqyail-i mail khul-a nail gaq pevq nail, ngal Paolluv ngaol. ² Ngaq-ai nee mail jaol nail aqivq jaqbheq iqsanl nee mail, Gaqlaqtil milkhaoq bhai jaol nail Khali yaq munl juq bhai haoqgavq gevq bhoel-ai lavq-a nail ngaol.

³ Ngadao nail Aqbhu Miqyail khi Heeqphaq Yeiqsul Khali nail geeqlaoq eeljaol khi neesal-ovq nail phağ, nuljuq nail kovtavq bhai jiav dei-eiq. ⁴ Yeiqsul Khali al gaq, ngadao nail Aqbhu Miqyail neema tsaq nail khe-ai, mao-ail haqeiv nail niil yeel nail lavqkhoel, ngadao bhai bhi jel-ail nail haqbhoil, ngadao nail oeqbal tsiqhaol nail khi, aivq nail aqmaol laol bhiq-a nail ngaol. ⁵ Miqyail bhai nqmaq maqluv halyeel tsiqeeq bhel. Aqmiq.

Lavqkhiq tsail nail geeqlaoq daoq neq, teevq phağ taivq-ail tsaq nail ngaol

⁶ Khali nail geeqlaoq eeljaol lavqkhoel, nuljuq bhai khul-a nail gaq bhai nuljuq lavqtsail mail khaonq khi, lavqkhiq tsail nail geeqlaoq daoq yaoq phağ yaoq-ao bhai, lavqtsail mail hav bhoel nail ngel-i mail, ngaq bhai noeq-u maq dov-ail pevq-il. ⁷ Maldil dai, ge haq neq, lavqkhiq tsail nail geeqlaoq daoq yaoq phağ yaoq maq jiav-ail. Thailhai ngaol-aoq, nuljuq bhai lav suqsaq khi Khali nail lavqkhiq tsail nail geeqlaoq daoq bhai oil phal movq nail tsaol-aq teevq juq jaol nail ngel-i mail, ngal niailhai ge nail ngaol. ⁸ Nvjuq maqkhaiq, nqtavq gaqkhoel maqkhaiq, nvjuq-i mail nuljuq bhai cavq bhiq-a nail lavqkhiq tsail nail geeqlaoq daoq niilniai nee bheeq-n nail, lavqkhiq tsail nail geeqlaoq daoq yaoq phağ yaoq cavq haq neq, khal cavq nail gaq nail kovtavq bhai iqkhail yavq nail phağ kev lee dei-eiq. ⁹ Iqmoeq-u phao nvjuq-i mail ge jel-a nail daoq bhai niil aq-il ngal teevq pov gaoq ge pov nail ngaol. Tsaol-aq teevq gaq ganav, nuljuq-i

mail hav bhoel jel-ai thaq nail lavqkhiq tsail nail geeqlaoq daoq bhai maq dul lai nail lavqkhiq tsail nail geeqlaoq daoq yaoq pha q yaoq cavq lal haq neq, aivq nail kovtavq bhai iqkhail yavq nail pha q kev lee dei-eiq.

¹⁰ Tsaol-aq yaq neema tsaq dai, nl nail maq ngel. Miqyail neema tsaq nail pha q bhai ngal nl movq nail ngaol. Tsaol-aq yaq neekhaol sil nail pha q bhai ngal laijai khi nl nail ngel-ail laiq. Alhai gaoq nl haq neq, ngal Khali nail yaqkav maq ngel yaoq-aol.

Paolluv khalhai khi gaqkhoel pevq lal-a nail ganl

¹¹ Aqivq jaqbheq juq-ol, ngaq-i mail cavq nail lavqkhiq tsail nail geeqlaoq daoq niil neq, tsaol-aq yaq jaol nail nee dov lee-a nail maq ngel-ail dai, nuljuq bhai bhi heeq kivq movq-ail nial.

¹² Tsaol-aq yaq-i mail cavq lavq cov lavq-a nail iqsanl maq ngel-ail. Yeiqsul Khali-i mail ngaq bhai phaodaiq lavq-a nail ngaol.

¹³ Ngal Yuldav nail tsaol-aq nail aolsaolkovq thaoq-u phao, ngal aqdoevq khalhai doevq-a nail ganl, nuljuq ya gaiq daiq-a nail ngaol. Aq-u phao, ngal Miqyail nail Khali yaq munl bhai mailma-ail khoeq khi, lav luq lav seil nail dai khi, laijai-a nail ngaol. ¹⁴ Ngal ngaq nail aqphiq aqbhal-i mail thaoq khal leevq-a nail aolsaolkovq bhai, neema kev deede nail ngel-i mail, ngaq nail jeq-e jaq-a nail lavqkhoel bhai, ngaq-ai khe-ai aqkovq jiav nail tsaol-aq nee maqtsil maodai, Yuldav nail tsaol-aq nail aolsaolkovq thaoq-a nail ngaol. ¹⁵⁻¹⁶ Thailhai ngaol-aq, ngal maq doevq

lee-u nee mail, ngaq bhai tsel dov khi, aivq nail geeqlaoq eeljaol nee mail ngaq bhai khul lavq-a nail Miqyail neq, aivq nail Yaqyov nail gan lavqkhiq tsail nail geeqlaoq daoq niil yu nail jeqe jaq-a bhai cavq bhiq ail dai, aivq neema tsaq nail khe-ai, aivq nail Yaqyov ngaq bhai bhi moel lavq-a nail ngaol. Bhi moel lavq gaq-al ngal-aq neq, ngal tsaol-aq yaq bhai maoqbhaoq nla nail maq ngel. ¹⁷ Ngal gaqkhoel maq pevq lal-u nee mail, gaqkhoel pevq thailthaiq nail, Yeiqlulsaqlaiq meenq bha jaol nail juq jaol nail bha ngal maq lai-al. Teevq pov taivq-ail Aqlal milkhaoq bhai ail-a nail ngaol. A bhai nee ngal-aq, Daqmaqsail meenq bhai kovq lai-a nail ngaol.

¹⁸ Hail kovq bhee lal-u phao, Geiqphal jaol nail bha nalga lai nail dai khi, Yeiqlulsaqlaiq meenq bha dav lai-a nail ngaol. Aivq nee mail tsel ngaq n jaol-a nail ngaol. ¹⁹ Yeiqsul nail jaqbheq Yaqkov maq ngel nail neq, ngal gaqkhoel teevq gaq bhai iqsanl maq moel-al. ²⁰ Ngal nuljuq bhai niailhai gevq bhiq-a nail neq, goiqbhaoq bhaoq nail maq ngel-ail dai, Miqyail nail sivtavq bhai ngal ge nail ngaol. ²¹ A bhai nee ngal-aq, ngal Sulliv milkhaoq khi Gillilciv milkhaoq bhai ail-a nail ngaol. ²² Aq-u phao, Yuldav milkhaoq bhai jaol nail Khali yaq munl juq, ngaq bhai maq heeq nia-ail haq-al. ²³ "Jel lal-u phao, ngadao bhai khoeq lavq-a nail al gaq, aq-u phao aivq-i mail lav luq lav seil-ail daiq-a nail, neema thaqtsaol nail geeqlaoq daoq al daoq, niil aq-il cavq bhiq thailthaiq nail ngaol" dai, ge nail bhai taivq-ail aqyu juq ya gaiq-a nail ngaol. ²⁴ Ngal bhaqda nee aqyu juq Miqyail bhai tsiqeeq nail ngaol.

2

Gaqkhoel juq Paolluv bhai hav-a nail ganl

¹ A bhai nee ngal-aq, tsel liq kovq bhee lal-u phao, ngal Tiltuv bhai hevq khi, Bhaqnaqbhal nee mail Yeiclulsaqlaiq meenq bha gaoq lai-a nail ngaol. ² Miqyail ngaq bhai phaodaiq lavq-a nail ngel-i mail, lai-a nail ngaol. Aqivq aqtsu juq nee aqtsi tsu dai, thaoqphuq khi, Yuldav nail tsaol-aq maq ngel nail juq bhai, lavqkhiq tsail nail geeqlaoq daoq cavq ail-a nail ganl, ngal ge bhiq-a nail ngaol. Ngaq-i mail nl jel lavq-a nail pha q khi niil aq-il nl thailthaiq nail pha q bhai aqnieivq-ail maq bhiq pevq-ail movq-i mail, alhai ge bhiq-a nail ngaol. ³ Ngaq-ai nee mail jaol nail Tiltuv neq, Heiqlaqsal tsaol-aq ngaol-aq, aivq bhai bavkov uqjaq oev bhiq yaoq dai, yu maq ge-ail. ⁴ Yeiqsul Khali bhaqda nee ngadao juq-i mail ya-a nail jel-ail nail pha q bhai khoiq heldaiq khi, ngadao juq bhai aoldaoq kovqdaoq bhai juq khi, aqyu juq nail kov-uvq bhai bhi jaol nail dai khi, tsaol-aq teevq pav ganav juq, nvjuq nail lavqkhoel bhai aqtsi tsu dai aol khoiq lal-a nail ngaol. “Nvjuq neq, nuljuq nail aqivq jaqbheq ngaol” dai, aqyu juq ge khi ngaol-aq, maldil aqivq jaqbheq maq ngel-ail. ⁵ Lavqkhiq tsail nail geeqlaoq daoq nail maldil tsaq nail pha q nuljuq nail lavqkhoel bhai ivq dai, nvjuq aqyu juq nail daoq bhai teevq peivq-ail maq hav bhoel-ail.

⁶ Aqivq aqtsu bhi jiovq-ai tha q nail tsaol-aq al juq iqsanl, ngaq nail haqbhoil teevq-eel nul

neq, thoi dai dai-ail bheeq-n nail dai, maq noeq-ail. Khul khi mail dai ngal-aq neq, Miqyail neq, tsaol-aq yaq bhai, lavqniil phao taivq-ail heldaiq khi dal nail maq ngel-ail. Aqivq aqtsu al juq neq, ngal cavq nail juq nee maqtsil, aljaiq khul teevq phaqa-ail maq ge laoq lavq-al. ⁷ Al ovqtavq, Yuldav nail tsaol-aq bhai lavqkhiq tsail nail geeqlaoq daoq cavq bhiq yaoq dai, Miqyail Bheiqtuvluv bhai av bhiq-a nail khe-ai, yu nail jeq-e jaq-a bhai lavqkhiq tsail nail geeqlaoq daoq cavq bhiq yaoq dai, Miqyail ngaq bhai av lavq-a nail ngaol dai, aqyu juq heldaiq moel-a nail ngaol. ⁸ Khul khi mail dai ngal-aq neq, “Yuldav nail tsaol-aq nail haqbhoil ganl nl yaoq” dai, Bheiqtuvluv bhai alyaq bivq-a nail Miqyail, “Yu nail jeq-e jaq-a nail haqbhoil ganl nl yaoq” dai, ngaq bhai iqsanl, alyaq bivq lavq-a nail ngaol.

⁹ Ngaq bhai bivq lavq-a nail geeqlaoq bhai aqyu juq ya moel-u phao, Yaqkov, Bheiqtuvluv khi Yaolhaq, aqyu juq Bhaqnaqbhal nv-nvq gaq bhai aqlavq cavq lavq-a nail ngaol. Alhai khi lavq-a nail al neq, aqtsaoq tsaog nail dai, ge movq nail ngaol. Aqyu juq neq, yu nail sivtavq bhai neema ivqdao dai aol nail aqivq jiovg nail juq ngaol. Nv-nvq gaq yu nail jeq-e jaq-a jaol nail bha ail nail bhai maqkhaiq, aqyu juq neq, Yuldav nail tsaol-aq jaol nail bha ail nail bhai maqkhaiq, maoqbhaoq nl tsaq-a nail ngaol. ¹⁰ Aqyu juq nail munl lavqkhoel khe, haq nail aog nail tsaol-aq juq bhai thaq nioilpeivq lavq dei-eiq dai, aqyu juq nv-nvq gaq bhai hal-ail teevq-eel ngaol. Alhai nl nail neq, ngal iqsanl neema kev deede nail ngaol.

Paolluv Aqdil-aog meenq bhai jaol-u phao, Bheigtuvluv bhai khaq-a nail ganl

¹¹ Teevq pov, Bheigtuvluv Aqdil-aog meenq bhai kev lee-u phao, aivq-i mail nl nail teevq peivq-ail maq tsaq nail pha q bhaqlaoq kheq dai, dov lal-a nail ngel-i mail, ngal aivq bhai yu nail siltavq nee khaq-a nail ngaol. ¹² Khul khi mail dai ngal-aq neq, Yaqkov nail tsaol-aq juq maq kev lee-u phao neq, Bheigtuvluv yu nail jeq-e jaq-a nee mail kovqkhail aog jaoq jaoq thailthaiq nail ngaol. Thailhai ngaol-aog, tsaol-aq al juq kev lee-u phao, Yuldav nail tsaol-aq maq ngel nail juq bhai iqsanl, bavkov uqjaq bhiq oev movq nail juq bhai geesil nail ngel-i mail, yu nail jeq-e jaq-a nee pav ail khi, aqtsaog iqsanl maq tsaog-ail jaol nail ngaol. ¹³ Yuldav nail tsaol-aq Khali yaq yaoq juq yaoq iqsanl, aivq khe-ai maq ngel nail pha q nl nail ngaol. Alheel ngel-i mail, Bhaqnaqbhal iqsanl aqyu juq khe-ai nl nail ngaol.

¹⁴ Aqyu juq lavqkhiq tsail nail geeqlaoq daoq maldil tsaq nail lavqkhoel bhai daolcoev dai, maq jaol nail bhai ngal ya moel-u phao, ngal aqyu juq iqsanl nail siltavq bhai Bheigtuvluv bhai niailhai ge bhiq-a nail ngaol: “Naol Yuldav nail tsaol-aq pevq khi ngaol-aog, Yuldav nail tsaol-aq nail aol maq thaoq-ail, yu nail jeq-e jaq-a nail aol thaoq nail bhai, yu nail jeq-e jaq-a Yuldav nail tsaol-aq nail aol ya thaoq nail ngaol dai, khul khi mail aqyu juq bhai khoel nail-aiq” dai, ge bhiq-a nail ngaol.

Neema thaqtsaol nail bhaqda nee, tsaq nail daol nail tsaol-aq pevq lal nail ganl

¹⁵ Ngadao juq neq, doevq lee-u nee Yuldav nail tsaol-aq ngaol. Yu nail jeq-e jaq-a oeqbal yaq maq ngel-ail. ¹⁶ Ngadao Yuldav nail tsaol-aq pevq khi ngaol-aq, Aoldaoq Kovqdaoq bhi nl lavq nail khe-ai nl-a nail ngel-i mail, tsaq nail daol nail tsaol-aq pevq lal nail maq ngel-ail. Yeiqsul Khali bhai neema thaqtsaol nail ngel-i mail taivq-ail pevq lal-a nail ngaol dai, ngadao juq heeq kivq nail ngaol. Ngadao juq iqsanl Khali bhai neema thaqtsaol nail ngel-i mail, tsaq nail daol nail tsaol-aq pevq lal dai, Yeiqsul Khali bhai neema thaqtsaol nail ngaol. Khul khi mail dai ngal-aq neq, aoldaoq kovqdaoq bhi nl lavq nail khe-ai nl-a nail ngel-i mail, tsaol-aq teevq gaq iqsanl tsaq nail daol nail tsaol-aq maq pevq lal nia-ail.

¹⁷ Khali bhaqda nee tsaq nail daol nail tsaol-aq pevq lal dai, ngadao juq halpov thailthaiq-u phao, ngadao juq oeqbal yaq ngaol dai, dov lal haq neq, Khali neq, oeqbal nail haqbhoil ganl nl nail gaq laiq. Maq ngel-ail dei-eiq. ¹⁸ Ngaq-i mail peiv ha-a nail aoldaoq kovqdaoq bhai ngal gaoq lav meeq-ail nul neq, ngal neq, aoldaoq kovqdaoq bhai nl bheeq-a nail tsaol-aq teevq gaq ngaol. ¹⁹ Khul khi mail dai ngal-aq neq, ngal Miqyail phao aqdoevq doevq kivq dai, aoldaoq kovqdaoq bhai juq khi, aoldaoq kovqdaoq phao sil-a nail ngaol. ²⁰ Ngal Khali nee mail lavqyavq kovtavq bhai tavq heivq-a nail ngaol. Alheel ngel-i mail, niil aq-il ngal aqdoevq doevq nail neq, ngal doevq nail maq ngel-ail. Khali ngaq nail lavqkhoel bhai aqdoevq doevq nail ngaol. Niil aq-il ngal aqsivq haqjoil phao aqdoevq doevq nail neq, Miqyail nail Yaqyov bhai neema thaq

tsaol khi doevq nail ngaol. Aivq neq, ngaq bhai gaiq-a khi, ngaq nail haqbhoil aivq nail aqmaol laol bhiq-a nail ngaol. ²¹ Ngal Miqyail nail geeqlaoq eeljaol bhai aqnieivq-ail maq bhiq pevq-ail. Aoldaoq kovqdaoq bhaqda nee tsaq nail daol nail tsaol-aq pevq lal-ail nul neq, Khali sil-a nail neq, aqnieivq ngaol.

3

Neema thaqtsaol nail ngel-i mail Aqhaqlal Miqyail ya-a nail ganl

¹ Gaqlaqtil milkhaoq bhai jaol nail tsaol-aq juq-ol, nuljuq neq, aqtheq aqniaov niaov deedee-il. Yeiqsul Khali lavqyavq kovtavq bhai tavq heivq-a nail ganl, nuljuq bhai aqmeeq-ai ge moel bhiq gaq khi ngaol-aq, khaq sil gaq-i mail nuljuq bhai goiqbhaoq bhaoq nail daoq bhai, naldaiq yaoq dai, gaq ge lavq-a nail-aiq. ² Ngal nuljuq bhai daoq niil daoq naldaiq movq-ail nial. Nuljuq Aqhaqlal Miqyail bhai ya-a nail neq, aoldaoq kovqdaoq bhi nl lavq nail khe-ai, nl-a nail ngel-i mail ya-a nail laiq. Maq ngel haq neq, lavqkhiq tsail nail geeqlaoq daoq bhai neema thaqtsaol-i mail ya-a nail laiq. ³ Nuljuq thoi dai theq thoi dai niaov nail laiq. Nuljuq Aqhaqlal Miqyail bhai juq khi iqmoeq ilmoeq nl-ai thaq khi ngaol-aq, niil aq-il aqsivq haqjoil bhai juq juq-ail khi nl gil nail khi laiq. ⁴ Haq dee aq deedee nail al juq nuljuq aqnieivq-ail daq nail laiq. Al juq aqnieivq ngaol dai, ngal maq noeq-ail. ⁵ Al ovqtavq, Miqyail nuljuq nail lavqkhoel bhai Aqhaqlal Miqyail bhi jaol lee khi nuljuq nail lavqkhoel bhai bhaqaoq

eeq deedee nail phaḡ nl dol lavḡ-a nail neḡ, nuljuḡ aoldaoḡ kovḡdaoḡ bhi nl lavḡ nail khe-ai nl-a nail ngel-i mail laiq. Maḡ ngel haḡ neḡ, lavḡkhiḡ tsail nail geeḡlaoḡ daoḡ bhai neema thaḡtsaol nail ngel-i mail laiq.

Miqyail Aqbhaqlaqhaḡ bhai saljial jaḡ bhiḡ-a nail ganl

⁶ Alhai dul dai, Aqbhaqlaqhaḡ Miqyail bhai neema thaḡtsaol nail ngel-i mail, Miqyail aivḡ bhai tsaḡ nail daol nail tsaol-aḡ ngaol dai, saol-nvḡ-ai thaḡ nail ngaol. ⁷ Alheel ngel-i mail, neema thaḡtsaol nail tsaol-aḡ juḡ neḡ, Aqbhaqlaqhaḡ nail aḡjievḡ lilheel maldil ngaol dai, heeḡ kivḡ thaḡ-ai yaoḡ. ⁸ Yu nail jeḡ-e jaḡ-a neema thaḡtsaol nail ngel-i mail Miqyail aḡyu juḡ bhai tsaḡ nail daol nail tsaol-aḡ bhi pevḡ lal nail ngaol dai, maḡ pevḡ lal-u nee mail Jalliq heeḡ nia moel nia-ai thaḡ nail ngaol. “Naol bhaḡda nee, jeḡ-e jaḡ-a iḡsanl mail geeḡlaoḡ ya nail ngaol” dai, Miqyail Aqbhaqlaqhaḡ bhai iḡmoeḡ ilmoeḡ lavḡkhiḡ tsail nail geeḡlaoḡ daoḡ cavḡ bhiḡ-a nail ngaol. ⁹ Alheel ngel-i mail, neema khal thaḡtsaol nail tsaol-aḡ, neema thaḡtsaol nail Aqbhaqlaqhaḡ nee mail geeḡlaoḡ ya naol.

¹⁰ Aoldaoḡ kovḡdaoḡ bhi nl lavḡ nail khe-ai nl nail tsaol-aḡ, iḡkhail yavḡ nail kov-uvḡ bhai jaol nail ngaol. Khul khi mail dai ngal-aḡ neḡ, aoldaoḡ kovḡdaoḡ lavḡkhoel bhai khal gevḡ-ai thaḡ nail yaoḡ phaḡ yaoḡ-ao nee bhai, khaḡ mao iḡsanl maḡ nl nail tsaol-aḡ iḡsanl mail, iḡkhail yavḡ nail bhai ya daḡ nail ngaol dai,

Jalliq bhai gevq-ai thaq nail ngaol. ¹¹ Aoldaoq kovqdaoq bhaqda nee tsaol-aq teevq gaq iqsanl, Miqyail nail sivtavq bhai tsaq nail daol nail tsaol-aq maq pevq lal nia-ail dai, bhaqlaoq kheq dai, dov lal-a nail ngaol. Khul khi mail dai ngal-aq neq, tsaq nail daol nail tsaol-aq neq, neema thaqtsaol nail bhaqda nee, aqdoevq ya doevq nail ngaol. ¹² Thailhai ngaol-aq, aoldaoq kovqdaoq neq, neema thaqtsaol nail pha q bhai maq tavq-ail. Khul khi mail dai ngal-aq neq, “Aoldaoq kovqdaoq nail lavqkhoel bhai khal gevq-ai thaq nail yaoq pha q yaoq-ao nee bhai, nl bhee nail tsaol-aq, al bhaqda nee ya doevq nail ngaol” dai, Jalliq lavqkhoel bhai gevq-ai thaq nail ngaol. ¹³ “Lavqyavq kovtavq bhai ya tavq heivq nail yaoq gaq yaoq-ao nee, iqkhail yavq nail bhai daq thailthaiq nail tsaol-aq ngaol” dai, Jalliq lavqkhoel bhai gevq-ai thaq nail ngaol. Alhai dul dai, Khali neq, ngadao juq nail haqbhoil iqkhail yavq nail bhai ya daq-a nail ngel-i mail, aoldaoq kovqdaoq neq, ngadao nail kovtavq bhai bhi kev lee nail iqkhail yavq nail pha q nail lavqkhoel, aivq ngadao bhai ul kovq lavq-a nail ngaol. ¹⁴ Alheel ngel-i mail, Aqbhaqlaqhaq bhai bivq-ai thaq nail geeqlaoq, Yeiqsul Khali lavqkhoel nee yu nail jeq-e jaq-a nail kovtavq bhai kev ail khi, “Ngal bivq naol” dai, Miqyail-i mail ge-ai thaq nail Aqhaqlal Miqyail bhai ngadao ya-a nail ngaol. Neema thaq tsaol nail bhaqda nee ya-a nail ngaol.

*Aoldaoq kovqdaoq khi saljial jaq nail pha q,
maq dul lai nail ganl*

¹⁵ Aqivq jaqbheq juq-ol, aivq nail nv aivq yuq nail daoqma uqhuq daoq teevq daoq ge daiq lavq bhel. Tsaol-aq nail gaiqlaq bhai daoqma saljial ge ceiv-ail khi haoqgavq aqmeeq-ai gevq ceiv-ai thaq haq neq, tsaol-aq-i mail ge ceiv-ai thaq nail daoqma saljial pevq-ail teevq-eel ngaol-aoq, teevq gaq iqsanl maq lav phal nia-ail. Aljaiq ge jaiq movq khi ngaol-aoq, maq ge jaiq nia-ail. ¹⁶ Aqbhaqlaqhaq khi aivq nail aqjievq bhai saljial al juq Miqyail-i mail ge bhiq-a nail ngaol. Aqjievq dai, ge nail neq, maodai gaq bhai ge nail maq ngel-ail. Naoq nail aqjievq dai, ge nail neq, teevq gaq bhai ge-ail teevq-eel ngaol. Al gaq neq, Khali ngaol. ¹⁷ Ngal ge movq nail neq, niailhai ngaol. Aqbhaqlaqhaq nee mail, Miqyail daoqma saljial jaq-a nail ngaol. A bhai nee pultavq liq yal hail tsel kovq bhee lal khi pultavq bivq-ai lee-a nail aoldaoq kovqdaoq al neq, Miqyail-i mail ge-ai thaq nail saljial al bhai, aqnieivq-ail maq bhi pevq-ail nia-ail. ¹⁸ Jaiqbhoil al bivq-a nail neq, aoldaoq kovqdaoq bhai tavq-ail nul neq, saljial bhai maq tavq-ail. Thailhai ngaol-aoq, Miqyail saljial bhai juq khi, Aqbhaqlaqhaq bhai jaiqbhoil aqnieivq-ail bivq-a nail ngaol.

Khul khi mail Aoldaoq kovqdaoq bivq-a nail ganl

¹⁹ Alheel ngel-i mail, aoldaoq kovqdaoq neq, khul nail ganl tsoiq nail-aiq. Yaqhao khe saljial ya nail aqjievq al gaq maq kev lee nail gaiqlaq bhai, laiq nail tsa nail pha q bhi dov lal nail dai khi, Aoldaoq Kovqdaoq bivq-a nail ngaol. Aoldaoq Kovqdaoq al bivq-u phao, Miqyail neq,

nqtavq gaqkhoel bhai juq khi, gaiqlaq bhai jaol nail gaq bhai bivq-a nail ngaol. ²⁰ Thailhai ngaol-aog, teevq gaq bhai taivq-ail tavq nail phaqq neq, gaiqlaq bhai jaol nail gaq maq loq-ail. Miqyail neq, teevq gaq teevq-eel ngaol.

²¹ Thailhai phal-iq, aoldaoq kovqdaoq neq, Miqyail-i mail ge-ai thaqq nail daoqma saljial bhai lav luqq lav seil nail laiq. Teevq peivq-ail maqq lav luqq maqq lav seil-ail. Bivq-ai thaqq nail aoldaoq kovqdaoq al, aqdoevq bhi doevq lal nia-ail nul neq, aoldaoq kovqdaoq bhaqda nee tsaqq nail daol nail phaqq maldil ya nail ngaol. ²² Thailhai ngaol-aog, Jalliq neq, yaoqq gaqq yaoqq-ao nee bhai oeqbal nail thaonqq lavqkhoel bhai laol thaiqq-ai thaqq nail ngaol. Yeiqsul Khali bhai neema thaqqtsaol nail ngel-i mail, Miqyail-i mail saljial jaqq-ai thaqq nail phaqq ya nail haqqbhoil, alhai laolthaiqq-ai thaqq nail ngaol.

²³ Thailhai ngaol-aog, Yeiqsul bhai neema thaqqtsaol nail phaqq maqq kev lee nail gaiqlaq bhai, kev lee thailthaiqq nail neema thaqqtsaol nail al phaqq bhai maqq phaodaiqq lavqq-u kev dai, aoldaoq kovqdaoq-i mail ngadao bhai laolthaiqq-ai thaqq nail ngaol. ²⁴ Neema thaqqtsaol nail ngel-i mail, ngadao tsaqq nail daol nail tsaol-aqq pevqq lal dai, aoldaoq kovqdaoq neq, Khali lee-u phao kev dai, ngadao bhai heldaiqq phail lavqq nail gaqq khe-ai dul nail ngaol. ²⁵ Nil aqq-il neema thaqqtsaol nail phaqq kev lee-aog nail ngel-i mail, ngadao bhai heldaiqq phail lavqq nail al gaqq nail pul-nvqq bhai maqq jaol yaoqq-aol.

²⁶ Nuljuqq iqsanl mail, Yeiqsul Khali bhai neema thaqqtsaol nail ngel-i mail, Miqyail nail yaqq juqq

pevq nail ngaol. ²⁷ Nuljuq Khali nail lavqkhoel bhai ulcuvq saol-a nail juq neq, aqgaq aqdoi doinq thaq nail khe-ai, Khali bhai doi-nq thaq nail ngaol. ²⁸ Nuljuq iqsanl mail, Yeiqsul Khali nail lavqkhoel bhai teevq munl taivq-ail pevq nail ngel-i mail, Yuldav nail tsaol-aq khi yu nail jeqe jaq-a dai, maq tselpav yaoq-aol. Yaqkav khi jel ail-a nail tsaol-aq dai, maq tselpav yaoq-aol. Yaqyov-aq khi yaqmai-aq dai iqsanl, maq tselpav yaoq-aol. ²⁹ Nuljuq Khali nail tsaol-aq ngel-i mail, Aqbhaqlaqlaqaq nail aqjievq lilheel iqsanl pevq khi, saljial jaq-ai thaq nail khe-ai, jaiqbhoil ovq nail tsaol-aq ngaol.

4

¹ Ngal niailhai ge movq-ail nial. Jaiqbhoil ovq nail gaq, jaiqbhoil iqsanl aivq nail pevq khi ngaol-aog, aivq yaqnoil-ail jiav-u phao neq, yaqkav teevq gaq khe-ai ya jaol nail ngaol. ² Aivq nail aqbhu-i mail ge ceiv-ai thaq nail al yang maq kev lal-u phao kev dai, yaq al gaq aivq bhai heldaiq phail nail juq khi yalkav bhai heldaiq phail nail juq nail kov-uvq bhai jaol nail ngaol. ³ Alhai dul dai, ngadao yaqnoil-ail jiav-u phao neq, miltsaq bhai tavq nail aol juq nail kov-uvq bhai yaqkav ya jiovq-a nail ngaol. ⁴⁻⁵ Thailhai ngaol-aog, aoldaoq kovqdaoq nail kov-uvq bhai laolthaiq-ai thaq nail ngadao bhai ul kovq khi, Miqyail nail yaq pevq lal dai, aqyanq kev lal-u phao, Miqyail aivq nail Yaqyov bhai khoel-ai leevq-a nail ngaol. Yaqyov al gaq, yaqmai-aq nee mail doevq lee-a nail ngaol. Aoldaoq kovqdaoq nail kov-uvq bhai doevq lee-a nail

ngaol. ⁶ Nuljuq Miqyail nail yaq pevq nail ngel-i mail, “Aqbhu-ol, ngaq nail Aqbhu-ol” dai, bhiq gul nail dai khi, aivq nail Yaqyov nail Aqhaqlal, ngadao nail neema lavqkhoel bhai bhi jaol lee-a nail neq, Miqyail-i mail khoel-ai leevq-a nail ngaol. ⁷ Alheel ngel-i mail, naol miltsaq bhai tavq nail aol nail yaqkav maq ngel yaoq-aol. Naol Miqyail nail yaq ngaol. Miqyail nail yaq ngel-i mail, Miqyail bhaqda nee jaiqbhoil iqsanl ovq naol.

Aoldaoq kovqdaoq nail yaqkav thaq gaoq jiovg

⁸ Jel lal-u, nuljuq Miqyail bhai maq heeq nia-u phao, miqyail maldil maq ngel nail juq nail kov-uvq bhai yaqkav jiovg-a nail ngaol. ⁹ Thailhai ngaol-aog, niil aq-il neq, Miqyail bhai heeq nia nail nee ovqtavq, maldil dai, ge haq neq, Miqyail nuljuq bhai heeq nia nail ngaol. Khul khi mail, gaq bhaq deede kxi khul teevq pha q iqsanl, maq nl nia nail miltsaq bhai tavq nail aol juq, gaoq nl kovq ail nail-aig. Nuljuq al juq nail yaqkav gaoq jiovg movq nail laiq. ¹⁰ Nuljuq neq, nv lao lao-ai haq nail ngaol. Lav lov lav ceiv iqsanl, aqkovq aqlav iqsanl lao-ai haq nail ngaol. ¹¹ Ngaq-i mail nuljuq nail haqbhoil khal nl khal hal-a nail juq, aqnieivq-ail pevq-ail nail khul-il dai, ngaq bhai khaoqlaol-ail nial.

¹² Aqivq jaqbheq juq-ol, ngal nuljuq khe-ai pevq lal-a nail ngel-i mail, nuljuq iqsanl, ngaq-ai khe-ai pevq lal yaoq dai, hal nail ngaol. Nuljuq-i mail ngaq bhai nl laiq lavq-a nail teevq pha q iqsanl, maq jiav-ail. ¹³ Ngal nal nail ngel-i mail, nuljuq bhai iqmoeq khe pov lavqkhiq tsail nail

geeqlaoq daoq ya cavq bhiq-a nail ngaol dai, nuljuq heeq nia nail ngaol. ¹⁴ Ngal alhai nal kav khoeq-u phao, nuljuq nail haqbhoil haq khi ngaol-aoq, nuljuq ngaq bhai khal nl movq-ail maq nl lavq-al. Khaonq iqsanl, maq khaonq lavq-al. Nqtavq gaqkhoel bhai hav nail khe-ai, hav lavq khi, Yeiqsul Khali bhai hav nail khe-ai iqsanl, hav lavq-a nail ngaol. ¹⁵ Aq-u khe nuljuq nail lavqkhiq tsail nail al, niil aq-il khaq bha bhi peivq ail-aoq nail-aiq. Khul khi mail dai ngal-aq neq, nuljuq nail maivneev kevq dov khi ngaq bhai oil covq lavq nia nail kheel nul neq, oil covq lavq nail ngaol dai, nuljuq nail ganl ngal salkhil khaq kivq naol. ¹⁶ Niil aq-il ngal nuljuq bhai maldil tsaq nail pha q ge bhiq-a nail ngel-i mail, ngal nuljuq bhai neejia v jia v nail tsaol-aq pevq lai-a nail lai q.

¹⁷ Tsaol-aq al juq nuljuq nail haqbhoil neema kev deede nail khe-ai, dul nail ngaol. Thailhai ngaol-aoq, aqmeeq pha q noeq khi neema kev nail maq ngel-ail. Nuljuq khi aqyu juq teevq dao bhai tavq lai nia dai, nuljuq ngaq-ai nee pav-ail nail bhai, aqyu juq oil movq nail ngaol. ¹⁸ Aqyu juq aqmeeq pha q noeq khi neema kev nail neq, aqmeeq ngaol. Ngal nuljuq nee mail jaol-u phao taivq-ail maq ngel nail, khaq mao iqsanl alhai nl nail neq, aqmeeq ngaol. ¹⁹ Ngaq nail yaq juq-ol, nuljuq Khali nail lavqkhoel bhai ee q lai heel lai-u kev dai, yaq tsiq-u phao nal nail khe-ai, ngal nuljuq nail haqbhoil teevq pov gaoq nal thailthai q nail ngaol. ²⁰ Ngal nuljuq bhai noeq-u maq dov-il. Alheel ngel-i mail, niil aq-il nuljuq nee mail jaol khi, aqthel lav phal khi mail cavq

bhiq movq-ail nial.

Haqgaqlal khi Saqlal nail ganl tsiq ceiv khi cavq bhiq-a nail ganl

²¹ Aoldaoq kovqdaoq nail pul-nvq bhai jaol movq nail juq-ol, nuljuq aoldaoq kovqdaoq ge nail bhai gaiq lal-ail lai. Ngaq bhai ge daiq lavq yaoq. ²² Jalliq lavqkhoel bhai niailhai gevq-ai thaq nail ngaol: Aqbhaqlaqlaqhaq nail yaqyov nvq gaq jaol nail ngaol. Teevq gaq neq, yaqkav jiovq nail yaqmai-aq gaq nail ovq nee doevq lee-a nail ngaol. Teevq gaq neq, jel ail-a nail yaqmai-aq gaq nail ovq nee doevq lee-a nail ngaol. ²³ Yaqkav jiovq thailthaiq nail yaqmai-aq gaq nail ovq nee doevq lee-a nail gaq neq, aqsivq haqjoil nail neenoeq bhaqda nee doevq lee-a nail ngaol. Bhuq-ail laq ail-a nail yaqmai-aq gaq nail ovq nee doevq lee-a nail gaq neq, Miqyail-i mail saljial jaq-ai thaq nail khe-ai, doevq lee-a nail ngaol.

²⁴ Ganl niil ganl nee tsiqceiv daiq haq neq, saol oil nail phaql aol nail ngaol. Yaqmai-aq al nvq gaq neq, daoqma saljial nvq phaql ngaol. Teevq gaq neq, Silnaq gaoqjaoq khe daoqma saljial bhai tavq nail Haqgaqlal ngaol. Aivq yaq tsiq-a nail neq, aoldaoq kovqdaoq nail yaqkav bhi jiovq nail dai khi, tsiq-a nail ngaol. ²⁵ Haqgaqlal neq, Aqlal milkhaoq bhai jiav nail Silnaq gaoqjaoq ngaol. Niil aq-il jiav nail Yeiqlulsaqlaiq meenq bha ge movq nail ngaol. Khul khi mail dai ngal-aq neq, aivq iqsanl, aivq nail yaq juq iqsanl, aoldaoq kovqdaoq nail yaqkav jiovq nail ngaol. ²⁶ Thailhai ngaol-aq, nqtavq kovtavq

bhai jiaiv nail Yeiqulsaqlaiq meenq neq, jel ail-a nail yaqmai-aq gaq pevq nail ngaol. Aivq neq, ngadao nail aqma ngaol. ²⁷ Jalliq lavqkhoel bhai niailhai gevq-ai thaq nail ngaol:

“Yaq maq jaol daiq-a nail
maq bhao aqma-ol,
lavqkhiq tsail yaoq.
Yaq tsiq nail bhai
maq ya daq daiq-a nail
yaqmai-aq juq-ol,
lavqkhiq tsail deede yaoq.
Khul khi mail dai
ngal-aq neq,
yovjil maq bhao nail
yaqmai-aq neq,
yovjil bhao nail
yaqmai-aq nee maq tsil
yaq* jaol lee nail ngaol” dai,
gevq-ai thaq nail ngaol.

²⁸ Aqivq jaqbheq juq-ol, Ilcav neq, Miqyail-i mail saljial jaq-ai thaq nail khe-ai doevq lee-a nail ngaol. Ngadao iqsanl alhai doevq lee-a nail ngaol. ²⁹ Aqsivq haqjoil nail neenoeq bhaqda nee doevq lee-a nail yaqyov al gaq, Aqhaqlal Miqyail bhaqda nee doevq lee-a nail yaqyov al gaq bhai khoeq bhiq jioqv bhiq nail khe-ai, niil aq-il iqsanl, khoeq bhiq jioqv bhiq nail ngaol.

³⁰ Jalliq lavqkhoel bhai khalhai gevq-ai thaq nail-aiq.

“Yaqkav jioqv nail aqyu nvq mayaq bhai the ha yaoq. Khul khi mail dai ngal-aq neq, yaqkav

* **4:27** 4.27 Aqhaqlal phao ge movq nail ngaol.

jiovq nail yaqmai-aq al gaq nail yaqyov neq, bhuq-ail lao ail-a nail yaqmai-aq al gaq nail yaqyov nee mail jaiqbhoil teevq peivq-ail maq ya-ail” dai,

gevvq-ai thaq nail ngaol.

³¹ Aqivq jaqbheq juq-ol, ngadao neq, yaqkav jiovq nail yaqmai-aq al gaq nail yaq maq ngel. Jel ail-a nail yaqmai-aq al gaq nail yaq ngaol.

5

Bhuq ail-a nail tsaol-aq ngel-i mail, ivqdao dai jaol yaoq

¹ Ngadao bhuq ail-a nail tsaol-aq pevq lal dai, Khali ngadao bhai bhi bhuq-ail lavq-a nail ngaol. Alheel ngel-i mail, ivqdao dai jaol yaoq. Aoldaoq kovqdaoq nail Yaqkav thaq gaoq jiovq.

² Ngal neq, Paolluv ngaol. Ngal nuljuq bhai ge lavq bhel. Nuljuq bavkov uqjaq oev nail Yuldav nail tsaol-aq nail aol thaog haq neq, Khali nuljuq nail haqbhoil ganl maq tsoiq-ail.

³ Bavkov uqjaq oev nail aol khal thaog nail tsaol-aq bhai ngal teevq pov gaoq ge lavq bhel. Aol al thaog nail tsaol-aq Yuldav nail tsaol-aq nail Aoldaoq Kovqdaoq iqsanl bhai, ya nl bhee nail ngaol. ⁴ Aoldaoq kovqdaoq bhaqda nee, tsaq nail daol nail tsaol-aq pevq lal naol dai, nuljuq khal noeq nail juq, Khali bhai gaoq ceiv ceiv-aog nail ngaol. Nuljuq neq, Khali nail geeqlaoq eeljaol nail lavqniil phao jiiv dol-aivq khi jaol nail tsaol-aq pevq nail ngaol. ⁵ Ngadao juq Yeiqsul bhai neema thaqtsaol nail bhaqda nee, tsaq nail daol nail tsaol-aq pevq lal dai, noeqthunq khi,

Aqhaqlal Miqyail bhai juq nail lavqkhoel nee daonq thailthaiq nail ngaol. ⁶ Khul khi mail dai ngal-aq neq, Yeiqsul Khali nail lavqkhoel bhai jaol nail tsaol-aq juq nail haqbhoil neq, bavkov uqjaq oev khi ngaol-aq, maq oev khi ngaol-aq, teevq phaqa-ail ganl maq tsoiq-ail. Goil nail gaiqa nail phaqa nl dol hal dol lavq nia dai, neema thaqtsaol nail al phaqa taivqa-ail ganl tsoiq nail phaqa pevqa nail ngaol.

⁷ Iqmoeq-u neq, nuljuq aqmeeq-ai tsaol-aivqa-a nail ngaol. Maldil tsaqa nail haoqnao bhai maq ya tsaothel-aivqa dai, khaqa sil gaqa nuljuq bhai lav tsoiq nail-aiq. ⁸ Nuljuq bhai jalmul mul nail al neq, nuljuq bhai khul-a nail, Miqyail nail lavqkhoel nee dov lee-a nail, maq ngel-ail. ⁹ Daoqma uqhuqa daoqa teevqa dao ge-ai thaqa nail khe-ai, deqtsiq micil cil teevqa-eel ngaol-aq, khaqmul teevqa heeq heeq lao bhai bhi bhaonq lal nia nail ngaol. ¹⁰ Ngala noeq nail khe-ai nuljuq iqsanl mail noeq dai, ngala Yeiqsul bhai juq juq-ail, neema thaqtsaol naol. Thailhai ngaol-aq, nuljuq nail neema bhai lav suqsaqa lal nail khul gaqa maqkhaiqa, Miqyail-i mail yalkhaqa dal nail bhai ya daqa naol. ¹¹ Aqivqa jaqbheqa juq-ol, bavkov uqjaq oev nail aol thaqa yaoqa dai, ngala cavqa nail cov nail ngel haqa neq, khul khi mail khoeqa nail jiovaqa nail bhai ngala ya daqa thailthaiqa ngel-ail. Ngala alhai cavqa nail cov nail ngel haqa neq, lavqyavqa nail ganl ngala cavqa thailthaiqa nail daoqa al juq neq, yu nail haqbhoil phaqaqthiqa thiqa nail daoqa juq maq ngel yaoqa-aol. ¹² Nuljuq nail neema bhai lav suqsaqa lal nail tsaol-aq al juq bhai, yovqgavqa bhai yovqgavqa bhi oev ha gil

movq-ail nial.

¹³ Aqivq jaqbheq juq-ol, nuljuq bhuvq-ail lao ail-a nail tsaol-aq ya pevq dai, Miqyail nuljuq bhail khul-a nail ngaol. Thailhai ngaol-aog, bhuvq-ail lao ail-a nail al bhail yovqgavq nail aqsivq haqjoil khal pevq movq nail khe-ai, thaq yuq. Gail nail gailq-a nail lavqkhoel teevq gaq nail yaqkav teevq gaq jiovq yaoq. ¹⁴ Khul khi mail dai ngal-aq neq, “Naoq nail aqmaol bhail gailq-a nail khe-ai, naoq nail aqjail bhail jaol nail tsaol-aq bhail gailq-a yaoq” dai, bivq-ai thaq nail daoq al daoq nail lavqkhoel bhail, aoldaoq kovqdaoq iqsanl mail bhee lal-a nail ngaol. ¹⁵ Thailhai ngaol-aog, nuljuq khaq pheeljaq khi, teevq gaq nee teevq gaq keivq heivq jaq haq neq, nuljuq pav-ail sav-ail khi cov-ail nail bhail yaolphaol yaoq.

Aqhaqlal Miqyail nail aqheeq juq

¹⁶ Aqhaqlal Miqyail hel-aivq lavq nail khe-ai, ail yaoq dai, ngal ge movq-ail nial. Alhai ail haq neq, nuljuq aqsivq haqjoil nail neenoq neekhaol haoqnao maq ail yaoq-aol. ¹⁷ Khul khi mail dai ngal-aq neq, aqsivq haqjoil nail neekhaol neq, Aqhaqlal Miqyail bhail lav tsoiq khi, Aqhaqlal Miqyail iqsanl aqsivq haqjoil nail neekhaol bhail lav tsoiq nail ngaol. Nuljuq nl movq nail khe-ai maq ya nl dai, al nvq gaq teevq gaq nee teevq gaq genl dev nail ngaol. ¹⁸ Aqhaqlal Miqyail hel-aivq lavq nail bhail nuljuq ail haq neq, nuljuq aoldaoq kovqdaoq nail kov-uvq bhail, maq jaol yaoq-aol.

¹⁹ Aqsivq haqjoil nail neekhaol bhaqda nee nl-a nail ganl juq neq, niailhai bhaqlaoq kheq

dai, moel lal-a nail ngaol. Khaqmiq sev nail, maq meeq maq haol nail phaql nl nail, maq tsaq maq daol nail lavqkhoel nee iqthaiq tavq jaol tavq nail. ²⁰ Thaoqphaoq aqma maolkhoel bhai uqhuq thaoq nail, laol nail sail nail, teevq gaq nee teevq gaq neejav jlav nail, khaq pheeljaq nail, yu bhai neekhaol maq sil nail, neema phail deede nail, yovqgavq nail haqbhoil taivq-ail saol-nvq nail, gaoq ail gail ail nail munl bhoilpav nail. ²¹ Yu bhai maivjeel jeel nail, jilpheeql daol bov nail, maq tsaq maq daol nail bhaoqaiq lav sav nail, alhai nl nail juq ngaol. Alheel phaql nl nail tsaol-aq, Miqyail Milkhaol bhai maq ya aol lai-ail dai, iqmoeq-u khe pov ngal nuljuq bhai ge bhiq-a nail khe-ai, niil aq-il thal khe pov iqsanl ge lavq bhel.

²² Thailhai ngaol-aol, Aqhaqlal Miqyail nail aqheeq neq, goil nail gaiq-a nail, lavqkhiq tsail nail, neesal-ovq nail, neenoeq heelma ma dai noeq nail, gaoqhaq gaiq-a nail, aqmeeq phaql aol nail, saljial ivq nail. ²³ Neema neenuq neebeiv aol nail, yovqgavq nail neema bhai gaq lai nail, niil juq ngaol. Niil juq thaql nl dai, gevq-ai thaql nail aoldaoq kovqdaoq teevq daoq iqsanl maq jlav-ail. ²⁴ Yeiqsul Khali bhai khal tavq nail tsaol-aq, yovqgavq nail aqsivq haqjoil phao maqkhaiq, aqsivq haqjoil nail nee-noeq neekhaol khi maivjeel jeel nail juq bhai maqkhaiq, lavqyavq kovtavq bhai tavq heivq-ao nail ngaol. ²⁵ Ngadao Aqhaqlal Miqyail bhai juq juq-ail aqdoevq doevq nail ngel haq neq, Aqhaqlal Miqyail-i mail hevq daiq lavq nail phao, ail bhel. ²⁶ Neema eeq nail maqkhaiq, iqdaiq

iqtsai dov lal dai nl nail maqkhaiq, teevq gaq nee teevq gaq maivjeel jeel nail maqkhaiq niil juq bhai khaonq ha bhel.

6

Teevq gaq nail yalkav teevq gaq tsao phi yaoq

¹ Aqivq jaqbheq juq-ol, tsaol-aq teevq gaq ganav nl lai q haq neq, aivq meeq lal jaq lal dai, nuljuq nail lavqkhoel khe, aqhaqlal phao gaq kav nail juq, neema neenuq neebeiv aol nail lavqkhoel nee, aivq bhai tsojao-ai bhiq yaoq. Thailhai ngaol-aq, naol iqsanl jalmul mul nail haoqnao maq ya tsaothel-aivq dai, yaolphaol yaoq. ² Nuljuq teevq gaq nail yalkav teevq gaq tsao phi yaoq. Tsaol phi haq neq, nuljuq Khali nail aoldaoq kovqdaoq bhai nl bhee thailthaiq nail ngaol. ³ Tsaol-aq teevq gaq ganav, teevq pha q-aıl maq nl nia khi ngaol-aq, “Ngal nl kivq deede nee naol” dai, noeq haq neq, aivq bhai aivq goiqbhaoq bhaoq nail ngaol. ⁴ Tsaol-aq yaoq gaq yaoq-ao nee, yovqgavq-i mail nl-ai tha q nail juq bhai saol-nvq yaoq. Alhai saol-nvq haq neq, yu-i mail nl-a nail bhai neekhaol maq sil mail, yovqgavq-i mail nl-a nail bhai neekhaol sil nail ngaol. ⁵ Khul khi mail dai ngal-aq neq, yaoq gaq yaoq-ao nee mail yovqgavq bhai dal nail ganl yovqgavq nl nail ngaol.

⁶ Miqyail nail daoq ya saol-a nail gaq, aivq bhai cavq bhiq cov bhiq-a nail gaq bhai, aivq jıav nail aqmeeq pha q yaoq pha q yaoq-ao nee bivq nail tsa q naol.

⁷ Thaq noeq bheeq dei-eiq. Tsaol-aq teevq gaq iqsanl, Miqyail bhai khal nl movq-ail maq nl nia-ail. Yovqgavq-i mail aqiq haiq-a nail khe-ai, yovqgavq ya gaiq nail ngaol. ⁸ Aqsivq haqjoil bhai tavq nail phaqaq, haiq haq neq, aqsivq haqjoil buvq-ail tsiq-ail nail phaqaq ya gaiq naol. Thailhai ngaol-aog, Aqhaqlal Miqyail bhai tavq nail phaqaq haiq haq neq, Aqhaqlal Miqyail bhaqda nee nqmaq maqluv halyeel doevq nail phaqaq ya gaiq nail ngaol. ⁹ Alheel ngel-i mail gaq maq bhaq dai, aqmeeq phaqaq nl bhel. Ngadao neema maq cov haq neq, yanq kev lal-u phao, ya gaiq nail ngaol. ¹⁰ Khal eivq lal-u phao, tsaol-aq iqsanl nail haqbhoil aqmeeq phaqaq nl bhel. Yeiqsul bhai neema thaqtsaol nail lavqkhoel aqivq jaqbheq pevq nail tsaol-aq juq nail haqbhoil, a dai nee maqtsil nl bhel.

Haoqnao naosaq khe daoq

¹¹ Ngaq nail aqlavq-i mail nuljuq bhai gevq bhiq thailthaiq nail haoqgavq aqgevq niil juq, khadai eeq nail-aiq dai, heldaiq daiq.

¹² Aqsivq haqjoil phao khe aol juq bhai heldaiq meeq lal dai, nl movq nail tsaol-aq juq neq, nuljuq bhai bavkov uqjaq oev nail aol thaoq yaoq dai, nuljuq bhai khoel deede nail ngaol. Aqyu juq alhai nl nail neq, Khali nail lavqyavq bhaqda nee hevqkovq nail phaqaq ya naol dai, cavq bhiq cov bhiq haq neq, khoeq nail jiovq nail phaqaq aqyu juq ya daq nail bhai, geesil nail ngaol. ¹³ Bavkov uqjaq oev nail tsaol-aq al juq iqsanl mail, aoldaoq kovqdaoq nail haoqnao maq tsaothe-ail, bavkov uqjaq oev nail aol niil

phaq bhai nuljuq nl dai, aqyu juq nl kivq naol dai, khaoqsail he movq nail ngel-i mail, nuljuq bhai bavkov uqjaq bhi oev movq-ail teevq-eel ngaol. ¹⁴ Thailhai ngaol-aog, ngal neq, ngadao nail Heeqphaq Yeiqsul Khali nail lavqyavq bhai taivq-ail, neekhaol sil duq jiav nail ngaol. Yaoq pha q yaoq bhaqda nee, neekhaol sil duq maq jiav-ail. Lavqyavq al bhaqda nee, miltsaq bhai tavq nail pha q, ngaq nail haqbhoil sil gil-aog nail ngaol. Ngal iqsanl miltsaq bhai tavq nail pha q nee sil-ail ceevq-ao nail ngaol. ¹⁵ Bavkov uqjaq oev nail maqkhaiq, maq oev nail maqkhaiq, khul teevq pha q-ail, ganl maq tsoiq-ail. Tsaol-aq aqsivq pevq lal nail taivq-ail ganl tsoiq nail ngaol. ¹⁶ Gaiq jel lavq-a nail daoq niil juq nail haoqnao tsaothe nail tsaol-aq iqsanl nail kovtavq bhai maqkhaiq, Miqyail Ilsaqlaiqlal nail tsaol-aq nail kovtavq bhai maqkhaiq, neesal-ovq nail pha q khi mail gaoqhaq gaiq-a nail pha q jiav dei-eiq.

¹⁷ Yanqgaol nee pultavq, tsaol-aq teevq gaq iqsanl ngaq bhai tha q gaoq suqsaq lal. Khul khi mail dai ngal-aq neq, ngal Yeiqsul nail haqbhoil khoeq nail jio vq nail pha q bhai ya daq-a nail malbavq jiav nail ngaol.

¹⁸ Aqivq jaqbheq juq-ol, ngadao nail Heeqphaq Yeiqsul Khali nail geeqlaoq eeljaol nuljuq nail neema lavqkhoel bhai aol dei-eiq. Aqmig.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022
aaaba9fd-8172-55cc-ad15-906f43ddb5a5